

't Herenhoentien



BESTE KIENDER!

De vekaansie staot weer veur de deure. Nog even, en dan gaon een boel meensken d'r weer mit volle tassen en koffers op uut. De iene gaot mit et vliegtuug veer vot, de ere mit de auto een aende et butenlaand in en de volgende op de fiets Nederland deur. D'r bin ok meensken die gewoon lekker thuis blieven. In de zommertied bin d'r ommes vlak bij huus ok alderhaande aorige dingen te beleven. Butendat hej' et dan ok es flink an tied om mit je speelgoed thuis te speulen. Waor jim ok henne, of wat jim ok doen gaon, wij weensken jim in elk

geval een prachtige zom-
mervekaansie toe. Wij weensken
vanzels ok alle kiender, die nao de
vekaansie naor groep drie gaon
hiel vule succes toe. En as jim dan
dommiet een betien schrieven
kunnen, meugen jim oons best
wel es schrieven hoe as et in
groep drie gaot!

Disse keer staot d'r weer een

hieleboel in 't Herenhoentien. Een
verhael over Piepmoes bij de
Lende mit een hiele grote
kleurplaete, een verhaeltien over
(waeter)lelies, een bouwplaete
waor as een lelie op staot, een
lietien en gao zo mar deur! Gao
mar gauw es kiekien.

TOT IN OKTOBER!

Welk lijntien kan Klaos
et beste volgen om
Piepmoes te pakken; 1,
2 of 3?



't Herenhoentien is veural bedoeld veur
groep 1 en 2 van et basisonderwies.
Et verschient 3 à 4 keer in 't jaor.

Piepmoes bij de Lende

Op een mooie dag leup Piepmoes lekker te kuieren. Dat hadde hij morgens vroeg op bedde al bedocht! "As et een betien knap weer is wi'k vandaege naor de Lende. De Lende is zoe'n mooi reviertien, ik bin daor in gien tieden west." En fluitende was hij op pad gaon.

Mar och heden, vier grune ogen keken Piepmoes nao. En twie statten begonnen te slaon. De iene stat was zwat mit een witte punte. De ere stat was wit mit een zwatte punte. Now weten jim zeker wel over wie ik het hebbe.

Juust, over de katten van de bureu. De zwatte katte mit de zwatte stat en de witte punte d'r op is ommes Klaos de kaeter. En de witte katte mit de witte stat en de zwatte punte d'r an is Miep. Miep is Klaos zien vrundinnegien. Jim moe'n weten dat Klaos en Miep al weer niet zokke mooie plannen hadden! Ze weren de veurige dag een betien ondeugend west. Daarom hadden ze veur straf niet zo hiel veule eten kregen van heur baosies. Dat Klaos en Miep hadden honger! Ommeraek! Een moesien zol d'r best in gaon! Ze mikten mekeer es an en ja heur, daor sloepten ze zwiepstattend henne. Aachter Piepmoes an!

Piepmoes hadde eerst niks in de gaten. Hij was al een aende van huus doe hij opiens wat heurde. Hij leup krek te prakkeseren. Welk lietien zol hij now weer es fluiten? Inienend miende hij wat gepoest en geblaos te heuren. "k Doe krek of heure of zie ik niks", docht Piepmoes. "Mar et zol me niks verbaozen as die aekelike Klaos en Miep aachter mij an zitten." Stiekem loerde hij es over et schoolder. Ja heur. In de veerte zag Piepmoes Klaos en Miep haost plat op et lief tussen de gröspollen deur sloepen. "Dat liekt niet zo best", docht Piepmoes. "Ik bin een hiel aende van huus. Waor kan ik hier vot kroepen, zo dat die beide katten mij niet pakken?"

Intied was hij zowat an de Lende toe. Mar de katten ok! "Kon'k mar hiel veer springen", scheidt er deur het moesien henne. "Zo veer, da'k over de Lende kon, dan wa'k die ellendige katten kwiet. Katten bin ja hatstikke benauwd veur waeter. D'r kan gien druppel regen valen of ze zitten al veur de deure te mierken dat ze in huus willen. Ja, ik moet zien da'k an de ere kaante van de Lende kom." En krek hadde hij dat bedocht of hij zag even veerder allegere pompeblaeden op het waeter drieven. Zol zoe'n pompeblad wel een moes holen kunnen? Ik daenke van wel. Mar zol zoe'n pompeblad wel een poes holen kunnen? Ik daenke van niet. Piepmoes leup zo hadde hij kon naor de pompeblaeden toe en sprong gauw op et eerste blad. En doe sprong hij op et twiede pompeblad. En van et twiede op et dadde. Krek zo lange tot hij an de ere kaante van de Lende was.

Now, jim hadden die katten es zien moeten. Daor stonnen ze zo lelk as spinnen. "Die vervelende moes is oons weer ontommen", blaosden ze. En Piepmoes? Die ston ze mooi uut te gniezen. Hij hadde een protte wille vanzels, dat kuj'm begriepen!

Veurleesverhael van Sietske Bloemhoff.

Bij et verhael Piepmoes bij de Lende heurt een hiele grote kleurplaete.
Die plaete is hiel geschikt om mit varve in te kleuren, vienen jim ok niet?
Veul plezier!

Lelie's



Lelie's bin echte zomerbloemen. Aj' om disse tied henne een bos bloemen kopen zitten d'r haost altied wel een peer lelie's tussen. Weten jim wel wat veur kleuren ze hebben kunnen? Geel, oranje, rose, wit, mar d'r bin ok lelie's die meer as iene kleur hebben.

Sommige meensken hebben ze wel in de tuun. Dat liekt hatstikke mooi. Ie moe'n allieend wel uitkieken veur et leliehaentien. Dat is een mooi insekt mit prachtige rooie vleugels. Et besien is gek op lelie's en vret ze et liefste hielemaole kael.

Aj' ze pakken zullen laoten ze heur gauw op 'e rogge op 'e grond valen en hollen heur doodstille. De boek van et leliehaentien is zwat zie, en dan ziej' ze vanzels niet liggen op de zwatte grond. Handig bekeken, vienen jim ok niet?

D'r binnen ok lelie's die as in et waeter gruuien. Zokke lelie's wo'n daarom waeterlelie's nuumd. De meest bekende bin de gele plomp en de witte waeterlelie. De wottel van de plaante zit in de grond onder et waeter. In et waeter zitten de stengels van de blaeden en de bloemen. De blaeden en de bloemen zels drieven op et waeter. Die blaeden bin zo groot en stark dat een moesien as Piepmoes d'r makkelik over henne lopen kan. Dat dot hij dan ok in et verhaeltien "Piepmoes bij de Lende".

Op ien van de inlegvellen het Saskia waeterlelie's tekend. Jim kun daor prachtige bloemen van maeken. As zoe'n bloeme klaor is kuj' him op wat waeter drieven laoten. De bloemblatties gaon dan vanzels eupen en de lelie bluuit!


De witte waeterlelie bluuit in et echt aenlik wit. Mar wij vunnen dat wat saai, dus het hij veur disse iene keer de kleur van zien femilielid, de gele plomp.

BAOKE ZWELVER

Tekst, mez.: Henk Bloemhoff



Bao-ke Zwelver is de naeme, dat jim we-ten wie a'k



bin! Sjoukien Sjielpster is mien wiefien, 'k hebde kiender bij mij in.



Zwelvertien, zwelvertien, kom toch gauw weer, kom toch gauw weer!



Zwelvertien, zwelvertien, kom toch gauw weer bij oons allegeer!


BAOKE ZWELVER

1. Baoke Zwelver is mien naeme,
dat jim weten wie a'k bin!
Sjoukien Sjielpster is mien wiefien,
'k heb de kiender bi'j mi'j in!
2. Metseler dat bin 'k van huus uut!
Zie, dat bin ik van mien vak!
Wie mien husien wel es zien het,
wet hoe 'k 't in mekere plak!
3. Meitieds legt mien wiefien eier,
mit zoe'n mooie, frisse kleur,
en de hiele lange zomer
breng ik meerstal bi'j jim deur!
4. Now bin wi'j in 't vere zuden,
hasems gaon wi'j d'r van deur.
'k Schrief dit briefien mit mien groeten,
en: tot ankem veurjaor heur!

(Refrein:)

Zwelvertien, zwelvertien, kom toch gauw weer,
kom toch gauw weer!
Zwelvertien, zwelvertien, kom toch gauw weer,
bi'j oons allegeer!

Et maeken van een wonder-waeterlelie



Knip de waeterlelie langs de dikke ranen uut. Knip dan de blatties tot de stippellijn in. Vouw vervolgens alle blatties naor et midden toe. Et laeste blattien moej' onder et eerste schoeven. Pak now bi'jglikeks een etersbod en doe daor waeter in. Leg de "dichte" waeterlelie op et waeter. Hiel langzem gaot de bloeme eupen. Mar et kan wel een half ure duren veur hi'j hielemaole eupen is.



Piepmoes is verdwaeld.
Wie helpt Piepmoes et
goeie pad weeromme
te vienen naor zien
kesteel?



*'t Herenhoentien wodt uutgeven deur de
Intergemientelike Begeleidingsgroep
Hiemkunde in Oost- en West-Stellingwarf.*

*An dit Herenhoentien warkten Jan de
Vries, Bart Beltman, Saskia Douma en
Sietske Bloemhoff mit.*

